

小爾雅義證

冊全

小爾雅義證

四部備要

經部

上海中華書局據墨莊遺

書本校刊

桐鄉 陸費達 總勘

杭縣 高時顯 輯校

杭縣 吳汝霖 校

丁輔之 監造

小爾雅義證自序

小爾雅者爾雅之羽翼六藝之緒餘也漢書藝文志與爾雅並入孝經家揚子雲張雅讓劉彥和之倫皆以爾雅爲孔門所記以釋六藝之文者然則小爾雅猶是矣漢儒訓詁多本爾雅毛公傳詩鄭仲師馬季長注禮亦往往有與小爾雅合者特以不著書名後人疑其未經援及然如說文所引爾雅之寇則固明明在小爾雅矣其中如金鳥之解公孫之僞請命之禮屬婦之名合符詩書深裨經謬沿及魏晉援據益彰李軌作解今雖不存而所注法言曼無邵美卽用雅訓是固足以名其學矣唐以後人取爲孔叢子第十一篇世遂以孔叢之僞而并僞之而酈氏之注水經李氏之注文選陸氏之音義孔賈之義疏小司馬之注史釋元應之譯經其所徵引核之今本粲然具存此可見孔叢本多刺取古籍而所取之小爾雅猶係完書未必多所竄亂也曩見東原戴氏橫施駁難僅有四科予旣援引古義一一

小爾雅義證卷一

涇 胡承珙

廣詁

淵懿邃蹟深也

淵者說文云淵回水也荀子曰水深則回古人訓同者字多通故禮記月令淵澤井泉注云今月令淵爲深是也懿者毛詩豳風七月女執懿筐傳云懿筐深筐也楚辭逢尤懿風后兮受瑞圖王逸注云懿深也釋名云懿優也言奧優也奧優亦深義大雅抑篇國語作懿毛傳抑訓密密亦深之義也文選洞簫賦注引曹大家列女傳注曰懿深遠也懿與懿聲義同邃者說文云邃深遠也水經注深水下引呂忱曰深水一名邃水考工記輿人參分車廣去一以爲隧鄭司農云隧謂車輿深也後鄭云隧讀如邃字之邃說文云邃深也玉篇云邃意思深也隧邃邃皆字異而義同蹟者易繫

辭聖人有以見天下之蹟京房許慎皆作蹟後漢范式碑張平子碑祝睦碑亦作蹟定四年左傳蹟有煩言賈逵曰蹟至也孔疏云易曰聖人有以見天下之蹟謂見其至深之處蹟亦深之義也荀子正名篇蹟然而不亂楊倞注蹟與蹟同蹟深也文選盧子諒答魏子悌詩清義貫幽蹟陸士衡演連珠是以天地之蹟該於六位李善注並引小爾雅曰蹟深也後漢書方術傳序皆所以探抽冥蹟章懷注引小爾雅曰蹟深也蹟近本誤作蹟今訂正

封巨莫莽艾祁大也

舊注封豕莫府祁寒皆言大也艾亦爲久

封者周頌烈文無封靡于爾邦商頌殷武封建厥福傳並云封大也文選七命蹙封稀李善注引小爾雅曰封大也案封與豐通邛谷風采葑采菲釋文云葑亦作豐豐有大訓故封亦爲大矣巨者方言云巨大也齊宋之間曰巨說文云鉅大剛也周禮鐘師肆夏呂叔玉注肆夏繁遏渠渠大也鉅渠巨皆聲近而義同唐釋元應

一切經音義卷三卷十卷二十五並引小爾雅曰巨大也莫者莊
二十八年左傳狄之廣莫莊子逍遙游篇廣莫之野釋文引簡文
注云莫大也淮南修務訓莫囂大心撫其御之手高誘注云莫大
也史記李廣列傳莫府省文書索隱引小爾雅訓莫爲大方言云
張小使大謂之模郭注模音莫亦此義也莽者呂氏春秋知接篇
何以爲之莽莽也高誘注云莽莽長大貌淮南子原道訓是故不
道之道莽乎大哉案莽與巨同訓大故王莽字巨君矣又案爾雅
蟒王蛇郭璞曰虵之最大者故曰王蓋蟒字从莽莽有大義故蟒
爲大蛇矣一切經音義卷六引小爾雅莽大也艾者廣言云艾老
也爾雅釋木大而散楸疏引樊光注大者老也後漢書蘇章傳三
輔號爲大人注云大人長老之稱艾旣爲老亦得爲大義相成耳
祁者小雅吉日其祁孔有傳云祁大也

頒賦鋪敷布也

頒者說文云頒賦事也案頒與班通周禮大宰八曰匪頒之式司農注頒讀爲班布之班爾雅釋詁班賦也郭注謂布與廣雅釋詁云班布也張平子東京賦云布教頒常賦者大雅烝民明命使賦傳云賦布也鋪者大雅常武鋪敦淮濱疏謂布陳敦厚之陳敷者禹貢禹敷土周禮大司樂疏引鄭注尙書云敷布也案鋪敷布三字古皆通用襄十二左傳引詩敷時繹思作鋪時繹思常武鋪敦淮濱釋文引韓詩作敷敦淮濱後漢書馮緄傳亦作敷敦淮濱禹貢禹敷土山海經海內經云禹鯀是始布土商頌長發敷政優優成二年昭二十年左傳俱引作布政優優儀禮聘禮管人布幕於寢門外注云今文布爲敷一切經音義卷二引小爾雅頒賦敷布也卷二十二引小爾雅頒賦布也卷二十五引小爾雅頒敷布也文選西都賦桑麻鋪棗李善注引小爾雅鋪布也

蓋戴燾蒙冒覆也

蓋者釋名云蓋加也加物上也又曰蓋在上覆蓋人也戴者釋名云戴載也載之於頭也孝經援神契曰抱戴注云在上曰戴說文云分物得增益曰戴增益者物加其上是戴與蓋義相同文選西都賦上反字以蓋戴李善注引小爾雅云蓋戴覆也後漢書班固傳注引同燾者說文云燾溥覆照也禮記中庸無不覆幬注云幬或作燾幬亦覆也方言云燾覆也又云燾戴也郭注此義之反覆兩通者蒙者說文云冡覆也爾雅釋言釋文引小爾雅云蒙覆也冒者說文云冒冡而前也考工記玉人天子執冒四寸注云名玉曰冒者言德能覆蓋天下也

鍾崇府最積灌聚樸叢也

舊注詩灌木
械樸皆叢義

鍾者昭二十一年左傳器以鍾之二十八年傳天鍾美於是杜注並云鍾聚也文選陸士衡君子行福鍾恆有兆李善注引小爾雅云鍾聚也據此似小爾雅此條本以諸字並訓爲聚今本皆釋爲

叢者雖二字本通疑傳寫者以聚與叢互易致誤耳崇者隱六年左傳芟夷蘊崇之僖二十四年傳棄德崇姦杜注並云崇聚也太元聚首陽不禁禦物相崇聚府者昭十二年左傳吾不爲怨府杜注云怨禍之聚廣韻引風俗通云府聚也公卿牧守道德之所聚也最者公羊隱元年傳會猶最也何休注云最之爲言聚若今聚會爲投最樂記會以聚衆注云聚或爲最史記殷本紀大最樂戲于沙邱徐廣曰最一作聚周本紀有周聚徐廣曰聚一作最文選鵬鳥賦注引鷦冠子曰憂喜聚門聚或作最最亦聚也周南葛覃釋文云叢俗作藂一本作最顏氏家訓書證篇云江南詩古本皆爲藂聚之藂而古叢字似叢字近世儒生因改爲叢解云木之叢高長者衆家爾雅及解詩無言此者案最當從說文作叢說文叢積也最犯取也本爲二字後人多混叢爲最叢字遂廢蓋叢本有聚義故叢亦通作叢史記功臣侯者年表蓼侯孔叢索隱引家語

作最

此最字亦當作最

是也顏氏徒謂叢字似最遂改爲叢斯不然矣文

選西征賦注引字林云叢聚貌叢與最同灌者大雅皇矣其灌其
栌傳云灌叢生也爾雅釋木云灌木叢木又云木族生爲灌詩疏
引孫炎云族叢也樸者方言云撲聚也楚謂之撲郭注云樸屬藜
相著貌爾雅釋木樸枹者詩疏引孫炎云樸屬叢生謂之枹說文
云莢瀆莢也从艸从升徐鉉曰一本注云莢衆多也兩手奉之是
煩瀆也徐鍇曰莢叢雜也廣韻樸草生莢也說文莢草多貌是樸
與樸義略同文選江賦注引字林云薄叢生也薄樸聲相近
閱搜履庀具也

閱者說文云閱具數於門中徐鍇繫傳云春秋傳曰大閱簡車馬
也具數一一數之也一切經音義卷十卷二十四並引小爾雅閱
具也搜者說文云按衆意也引詩束矢其按玉篇云按閱也案搜
與蒐通公羊桓六年注比年簡徒謂之蒐三年簡車謂之閱五年

大簡車徒謂之大蒐搜又與廋通禮記郊特牲注搜除處也釋文搜本又作廋周禮廋人注云廋之言數與說文閱具數義同故搜亦爲具也履疑當作展周禮充人展牲則告牲司農注云展具也禮記少儀主人展之以授使者注云展省具也庀者周禮遂師庀其委積司農注云庀具也庀通作比周禮大胥比樂官注云鄭大夫讀比爲庀庀具也錄具樂官廣雅云訛具也訛與庀同

攻爲話相旬宰營匠治也

舊注話旬未詳餘皆常義

攻者周禮瘍醫以五毒攻之注云攻治也話疑當作詰周禮大司馬制軍詰禁注云詰猶窮治也襄二十一年左傳子盍詰盜杜注詰治也相者昭九年左傳火水妃也而楚所相也杜注相治也楚之先祝融爲高辛氏火正主治火事也旬者廣雅釋詁云旬治也周禮均人公旬注云旬均也讀如營營原隰之營易坤爲均今書亦有作旬者爾雅釋訓昀昀田也釋文引字林作均均墾治也均

既爲治旬與均同故亦爲治矣宰者僖九年公羊傳宰周公何休注云宰治也春秋繁露云三代改制質文各相官曰宰故宰與相同爲治也營者小雅黍苗召伯營之箋云營治也大雅江漢來旬來宣箋云旬當爲營故營與旬同訓治匠者說文云均匠也方言廣雅並云均治也

蠲被禋屑潔也

蠲者小雅天保吉蠲爲饗傳云蠲絜也周禮宮人除其不蠲注云蠲猶潔也蠲通作圭周禮蜡氏大祭祀除不蠲注云蠲讀爲吉圭惟饗之圭圭潔也漢書陳勝傳勝故涓人將軍呂臣注云涓潔也涓人主潔除之人涓與蠲音義亦同被者說文云被除惡祭也史記外戚世家武帝被霸上集解引徐廣曰臨水被除謂之禋風俗通祀典曰禋者絜也仲春之時于水禋除故事取于清絜也禋者說文云禋潔祀也國語楚語云禋潔之服屑者邛風谷風不我屑

以傳云屑潔也

勿蔑微曼末沒無也

勿者古字與無通禮記月令毋敢詐僞呂氏春秋作勿敢僞詐孟
子勿奪其時荀子註引作無失其時史記張丞相傳集解引高堂
隆答魏朝訪云物無也物與勿同蔑者易剝蔑貞凶釋文引馬注
云蔑無也案蔑與無字本通論語亡之命矣夫漢書宣元六王傳
引作蔑之是也微者邶風式微云微君之故小雅伐木微我弗顧
傳並云微無也曼者廣雅釋詁云曼無也法言重黎篇神怪茫茫
聖人曼云又五百篇周之人多行秦之人多病行有之也病曼之
也李軌注云多行由君存而有之多病由君視之如無也又寡見
篇云曼是爲也皆以曼爲無案曼與無字亦通方言云豐蕘蕘蕘
也陳楚之郊謂之豐鄭注坊記云葑蔓菁也陳宋之間謂之葑蔓
之爲蕘猶曼之爲無矣又案曼蔑亦一聲之轉一切經音義引聲

類云篴蔓也今蜀土及關中皆謂竹篴爲蔓是其例也未沒者亦與蔑曼一聲之轉晉書乞伏暮末宋書又作乞佛蔑蔓亦其例也隆巢岸峻高也

隆者爾雅釋山宛中隆郭璞注云隆中央高荀子禮論云高者禮之隆也巢者說文云鳥在木上曰巢爾雅釋樂大笙謂之巢太平御覽引舍人注云大笙音聲衆而高也成十六年左傳楚子登巢車以望晉軍說文作轆云兵車高如巢以望敵也又云櫟澤中守草樓也廣雅云巢高也轆櫟巢並從巢義岸者說文云岸水厓而高者大雅皇矣誕先登于岸傳云岸高位也峻者說文作陵云陵高也文選江賦峻湍崔嵬李善注引小爾雅曰峻高也

逼尼附切局隣傳戚近也

逼者爾雅釋言云逼迫也說文云迫近也尼者說文云尼從後近之爾雅釋言卽尼也郭注云尼者近也尸子曰悅尼而來遠附者

廣雅釋詁云附近也說文駢近也與附同切者易剝六四象曰剝
牀以膚切近災也局者釋名云掬局也使相局近也又云曲局也
相近局也文選魏文帝與朝歌令吳質書塗路雖局守官有限李
善注引小爾雅曰局近也一切經音義卷二十五引小爾雅局近
也文選左太冲雜詩注引尸子曰八極爲局亦以局爲近傳者考
工記廬人重欲傳人注云傳近也釋名云扶傳也傳近之也古人
訓同者字多通襄十年遂滅偃陽穀梁作傳陽是其證也戚者周
書文酌解取戚免桎大戒解惠戚咸服孔鼂注並云戚近也又廣
雅云戚近也戚與戚同

邵嬭旨伐美也

邵者法言重黎篇種蠹不彊諫而山棲賢者不足邵也李軌注云
邵美也文選潘安仁河陽縣詩令名患不邵皇甫謐豪士賦序身
逾逸而名逾邵陸士衡演連珠是以四族放而唐劭王簡棲頭陀